

vnd glaubwürdiger zeugnis deren dingen/die ich selber mit Augē gesehen / vnd mit den Henden betastet habe / fürhalten / wider alle Betrieger vnd Landbescheisser je gethā / die da vil vnkosten / Müh vnd Arbeit / angewendet / vnd letztlich nichts anders weder einen ellenden außgang erreicht haben. Derwegen will ich es euch alles klar vnd offenbarlich außsagen / damit eben so wol die Vnerfahrnen / als wol die Erfahrnen / mögen etwas in diser Meisterschafft verstehen / vnd vns desselben halber keiner bescheldten möge. Dann die alten Weisen haben die sache so vngentlich vnd gar verwirret geschriben / das man ihr schreiben / nicht allein nit verstehn mögen / sonder sie auch nicht zusammen oberein stimmen haben / welches auß denn vrsachen geschehen vornemblich / damit sie diejenigen / die solcher edler Kunst nach trachten / entweder Betriegē oder aber von ihrem fürnehmen abschrecken köndten. Ich für mein Person aber / will alle Falschheit vnd Finsternus hinweg legen / vnd euch die warhafftige erfahrung samptlich für Augen stellen / vnd darumben die meinungen der Weisen hinzu setzen / die zu solchem fürnehmen am besten dienen / damit die ganze sache / dauon wir handeln offenbarlicher vnd heller verstanden werden möge.

Derwegen thun wir euch kundt fürs erste / das alle diejenige / die außser der Natur hierinnen arbeiten / Betrieger vnd Landstreicher seind / vnd das sie in einer vngewöhnlichen sache arbeiten / dann auß einem Menschen / wirdt nichts als ein Mensch geboren. Also auch auß einem vnuernünftigen Thier od. Bihe wirdt nur ein Viech geworffen / das also ein jegliches ding seins gleichen gebiret. Derhalben wer ein ding auß seinem eigenthumb nicht hat / der mag dasselbige seines gefallen auß einem anderen frembden ding nicht haben. Das sagen wir aber / damit niemand sein Gelt vergeblich verschwendte / dann so die Betrieger ihres groben vnuerstandts halben betrogen / vnd in armut gebracht wordē / so begeren sie auch andere zu betriegen vnd in armut zubringen / ich rath aber das sich niemandt in diser Kunst eynlasse / er sey dann auff vnzalbar vnkosten zuuor gefast / dan die sache ist ja am schwerlichsten zuerfinden / vnd hat manchen darumb zum Narren gemacht / aber so mans einmal erfunden wirdt haben / so wirdt nicht vil sonders / sondern nur